

usato per quel capetanio; et il zeneral nostro parlò acomodatamente e longamente, che *nihil supra*, e fu comendato da tutti. Da poi queste parole el capetanio portoghese fece far una colation dignissima in notabeli arzenti, e confeti numero infinito; *qua finita*, fo tolto combiato l'una parte e l'altra, andando el zeneral a la sua galia. E fazando l'una parte e l'altra forzo di velle, e fu remurechiato le sue nave da le nostre galie, *adeo* che a tre hore de note zonse tuta l'armata in porto di Corfù. E, per salutation a la terra, per portogalesi fonno trate infinite bombarde. *Iterum* foli risposo, sì per le bombarde di castelli, e fo fato fuogi la notte per alegrezza e per le nave armade; et per tutti i soracomiti fo fato trar assa' bombarde, che fo un stupor. Et poi, a dì 30 da matina, fo reiterado el trazer di le bombarde in el levar di le insegne, *etiam* nel levar di missier San Marco. Da poi a hore do di zorno, el zeneral feze vegnir tutti li copani de galie e barche de nave, che
 76* era numero infinito, con bandiere e stendardi e tapedi, e montato el zeneral in una barcha di le nave, e andò a la barza dil capetanio di Portogallo a levarlo; e cussì l'horo fece tal apparati di barche e stendardi. Et descenduto el capetanio portoghese, in la sua barcha, de nave, e fate le debite salutation da l'una e l'altra parte, el nostro zeneral montò in la barcha di Portogallo; e ambidoi, con tutte altre barche e copani seguitando, andono in terra con tanto strepito di bombarde per l'una e l'altra parte, che *nihil supra*. Desmontati in terra, andono a la chiesa di l'Anontia con assa' trombeti, tromboni e altri instrumenti, che l'uno e l'altro non se intendeva dil parlar si faceva. E, ditta la messa, ritornono a marina tutti, e introno in barcha tutti dō li capetanij insieme; et per el zeneral fu acompagnato el capetanio Portogallo a la sua nave; *iterum* fato li strepiti di bombarde per tutte dō le armade è ritornato el nostro general a galia. Da poi disnar vene l'altro capetanio, con tuta la sua compagnia e barche, *ut supra*, ben in hordine, a la galia dil zeneral. Et hessendo visto vegnir, el zeneral havia ordinato a tutte le barche e compani stesseno preparati a poppe; e cussì el zeneral montò in barcha con li retori di la terra, esso sier Marco Zen et li sopracomiti, e andono contra el portoghese, e lo feno montar in la barcha di esso zeneral, e veneno a galia, dove era preparata la poppe de tapedi finissimi, spaliere e tapezarie; e cussì la galia, fina al fogon, era tavolata de tavole, che non se vedeva i banchi, convertito de tapeti ogni cossa, e con spaliere a le bande fina al fogon. E fu fato una credentiera con arzenti

assai, molto superba, dove fu aparechiato confeti e frutti. Da poi, stati longamente in colloquio su la poppe, el zeneral et esso capetanio andono da basso in pizuola a consultar quello si havesse a far, con li interpreti et Marco Rizo, secretario; steteno longamente da basso; quello concluseno non se intende; e venuti poi li capetanij di sopra andono a torno la colation et stete assai, perchè su ditta poppe erano molti cavalieri. Durò la colation fino a la notte, fu acceso le torze e tolto combiato. E il zeneral volse acompagnar el capetanio portoghese a nave, ma lui non volse; e, rimasto il zeneral in galia, per sier Pietro Lion, baylo, sier Alvixe Venier, provedador a Corfù, e sier Marco Zen e li sopracomiti, fo dito capetanio acompagnato a nave. El qual, ascenso in la sua nave, fè acender *etiam* assa' torze, facendo luce su la banda fina tutti i soi fonno in nave; sì che un gratioso e benigno capetanio. Sono in tuto nave 29, tra le qual do di 1200 bote et tre de 600 fin 800, lo resto son navilij picolissimi, come navilij de Schiavonia, senza cheba, che porta vini a Venecia. Ben è vero hanno gran pompa; portano tenda sopra la poppe, come le galie di capetanij zenerali, le qual strasina per aqua, cussì le nave grosse come le charavelle, ch'è cossa superba a veder. Hanno incredibile quantità di artilarie, e sopra i navilij pizoli son piccole artilarie; cadaun navilio ha tre bombarde grosse di ferro, traze lire 50 di piera, lo resto picole; le nave grosse sono ben in hordine di grosse bombarde e pizole. Ditta armata puol meter in terra 5000 homeni non desconzando le nave, tra i qual homeni sono 60 cavalieri, benissimo in punto de vestimente e cadenelle d'oro al collo, ch'è cossa superba. Mostra esser nation benigna e gratiosa, mostrando tutti la gran benivolentia portano a la Signoria nostra. E, tratando di questo, qualcheuno di l'horo diseno, che za tre mexi partino di caxa sua, e con tal invention mostrava haver bisogno de danari e biscoti. Et da poi se intese, che 'l zeneral richiese quel capetanio si dovesse unir con l'armata francese, la qual era passata avanti, e andar a far fati. El qual capetanio rispose haver in mandato dal so re, che se l'armata turcha ussiva, quella dovesse investire e destruzer, ma non dovesse combater citade nè muri, per non dissipar l'armata, che, hessendo el suo re povero, non haveria da refarla. Parse al zeneral mala nuova tal risposta, a quello l'aspetava da lui, a dir che 'l fusse venuto in Levante per non far fati, et lo pregò venisse con lui a recuperar Durazo, el qual non volse; e lo invitò a la impresa di Santa Maura, nè *etiam* volse asentir; *unde*, tolta